

V E N D I M
Nr. 152, datë 22.3.2001

**PËR DISA SHTESA DHE NDRYSHIME NË VENDIMIN NR. 831, DATË 28.12.1998, TË
KËSHILLIT TË MINISTRAVE, "PËR DHËNIEN ME QIRA TË TOKËS BUJQËSORE,
PASURI SHTETËRORE"**

Në mbështetje të nenit 100 të Kushtetutës, dhe të nenit 15 të ligjit nr. 8318, datë 1.4.1998 "Për dhënie me qira të tokës bujqësore e pyjore, të livadheve dhe kullotave që janë pasuri shtetërore", me propozimin e Ministrit të Bujqësisë dhe Ushqimit, Këshilli i Ministrave

V E N D O S I:

Në vendimin nr. 831, datë 18.12.1998, të Këshillit të Ministrave, bëhen këto shtesa dhe ndryshime:

1. Pika I.1, paragrafi i parë ndryshohet si vijon:

"Drejtoria e Bujqësisë dhe Ushqimit ose Drejtoria e Shërbimit Pyjor në rreth, bën studimin për tokat bujqësore ose pyjore e me bimësi pyjore, të regjistruara në Zyrën e Regjistrimit të Pasurive të Paluajtshme, si pasuri shtetërore dhe që jepen me qira, në rrethin ku ajo shtrin juridiksionin."

2. Pika I.2 ndryshohet si vijon:

"Ministria e Bujqësisë dhe Ushqimit shqyrton dhe miraton studimet e paraqitura nga Drejtoria e Bujqësisë dhe Ushqimit në rreth, ndërsa Drejtoria e Përgjithshme e Pyjeve dhe Kullotave ato të paraqitura nga Drejtoria e Shërbimit Pyjor në rreth."

3. Në titullin e vendimit, si dhe në pikat I.1, shkronjat "a", "b", "c", "e" dhe II.4, pas fjalëve "... tokë bujqësore" shtohen fjalët "pyjore dhe me bimësi pyjore."

4. Pas pikës II.3, shtohet pika 3/1, me këtë përmbajtje:

"Bordi i dhënies me qira të tokës, pyjore e me bimësi pyjore, përbëhet nga nëntë anëtarë, të cilët janë Drejtori i Shërbimit Pyjor në rreth, specialist pyjesh, ekonomist, agronom, specialist blegtorie, specialist i mjedisit, specialist i kadastrës, topograf dhe jurist. Kryetar i bordit është Drejtori i Shërbimit Pyjor në rreth. Krijimi i bordit bëhet me urdhër të Drejtorit të Përgjithshëm të Pyjeve dhe Kullotave."

5. Pika II.5 ndryshohet si vijon:

"Bordi i dhënies me qira të tokës bujqësore, pyjore dhe me bimësi pyjore përcakton fituesin e ankandit dhe ia paraqet atë për miratim Ministrit të Bujqësisë dhe Ushqimit. Pas miratimit, bordi shpall fituesin dhe Drejtoria e Bujqësisë dhe Ushqimit ose Drejtoria e Shërbimit Pyjor në rreth, lidhin kontratat përkatëse."

Ky vendim hyn në fuqi pas botimit në Fletoren Zyrtare.

KRYEMINISTRI
Ilir Meta